



ONOFRIO SCASSI

di Ezio Baglini

A San Pê d'Æenn-a, unn-a dê-e ville patrizie che ancun existe – se dixè ne existesse ciu de cento – a l'è quella da tutti conosciua comme “villa Imperiale-Scassi, a Bellessa”; òua usâ comme schêua pubblica. L'edifiçio o l'è stæto edificou in ti anni 1560-3, comme “villa estiva pê a famiglia de Vincenzo Imperiale” ⁽¹⁾.

Onofrio Scassi, devegnuo celebre mëgo e politico ligure, o l'è visciuo da-o 1768 a-o 1836 ⁽²⁾. Nasciuo a Cogoëuo, in te-l'anno da-a perdita do possesso zeneize da Corsica, e primogenito de Agöstin e de Francesca Agnese, tutti dui de famigge non nobili ma facultose e con ascendenti tutti lauree; g'han daeto i nommi de Onofrio, Emilio, Maria.

O se dimostrou de ingegno precoce: a sezze anni o l'è stæto in grado de sostegnî – in te 'na pubblica disputa texi filosofiche e scientifiche con l'ônô de-a pubblicazion. O s'è laureò a Zena in scienze mediche e filosofia, a l'etæ de vint'anni (5 lûggio 1788) ⁽³⁾.

A 24 anni (1792) o l'è vegnuo a Zena pê inscrivise a-o Collegio de Mëxinn-a.

Chi, o l'ha avuo moddo de dimostrâ pê a prima votta a so capacitæ de abile equilibrista politico quande ghe toccou l'ônô de pronunziâ o discorso inaugurale pê l'insediamento dî neuvi senatô, duxe Gioseppe Maria Doia; ma in t'en consesso deliberante, politicamente diviso. O l'è stæto indefæti molto abile a elögiâ i innovatoi

pervaxi de idee rivoluzionaie, ma con a base de a conservazion dî principi e tradizioin sempre ciù solidi, senza creâ cangiamenti profondi ⁽⁴⁾.

Forte de conoscense raccheuggeite all'estero, l'han mandou (1795) in miscion in to ponente ligure, pê 'na strana epidemia de 'frevi pùtride-biliose e petecchiali' diffuse in ta popolazion e in te truppe françeisi ⁽⁵⁾.

Questa primma esperienza, risolta in breve, a g'ha frùttou un posto d'insegnante a l'Universitæ (1796). In te questo consesso, ascì a so capacitæ, in ciù quella professionale, a l'è stæta quella de gestî eletti incàregghi mantegnindo un contegno molto riservou, dignitoso e tempestivamente indipendente, cioè senza fàse trascinâ da-o çerne tra e tante correnti politiche de modda ⁽⁶⁾.

In ti anni 1799-1803, con a l'acme l'assedio a Massenn-a, o diventa – a 31 anni d'etæ – prescidente da-a Commiscion sanitaia ⁽⁷⁾. E in ti urtimi spaximi da Repubblica de Zena, o vegne promosso senatô (1804) e o fa parte da Commiscion mandâ a Milan pê offrî a Napoleon l'annescion a-a França; e quande l'imperatòu o l'arriva a Zena (1805), o discorso uffiziale de ricevimento o l'è toccou a le.

Questi trei fæti poevan 'macciâ' a relazion de-a polizia sabauda a-o re torinese, ancon primma do trattòu de Vienna; a dimostrazion che – za da primma – questo monarca o l'aveiva avùo garanzia de l'annescion e o se preparava a chi poei dâ incareghi. Ma o zà descrîto pareggio politico o ghe consente de mantegnî tutti i precedenti incareghi anche doppo, quande a polizia piemontese o l'ha classificou 'pescimo napoleonista, democratico, libero massacan' (massone?).

Anzi, a 47 anni comme Decano de-a facultæ, o l'è stæto introdùto a-a corte sabauda co-o titolo de mëgo onoraio, e gh'han daeto l'incarego de riorganizzâ o comparto sanitaio do regno, creando successive riforme. Ma da grande dignitoso personaggio comm'o l'èa, in te questo periodo o l'è restou apposta ciuttosto emarginòu in to grosso avvicedase a-a corte, dedicando a so attention a-e problematiche locali zeneizi ⁽⁸⁾.